

蔚州志卷十一

志九

艺文志上

经部
史部

经部

大学管窥

本朝魏象枢著

佚

案寒松堂集答朱小晋同年书称自著者有日知录力行录儒言录大学管窥问途集诸书皆理学也编摩数载概未成帙云云陈文贞公所撰墓志不载盖早年未定之作也然集中有致知格物解又有自序似即其书或当时仅成是篇或后来所删存者皆未可知也

愿学堂讲书

魏象枢著

佚

州守郑公牧民雅有移俗之志于明伦堂西捐俸建讲堂一所曰愿学堂造卢敦请甚恳余辞之至再不获已乃与郡绅士月一会讲明敦伦尽性之学自书四五经始每讲毕录而存之曰愿学

堂讲书

寒松老人年谱

愿学堂蔚州魏子环极讲学之所也予闻环极十年矣知为端人也既而从魏柏乡集中读其天地何功功在乾坤之后鬼神何事事在性命之先益向之丙午冬鳧盟寄讲书数章回环展玩识透本原语有把柄可谓深造自得矣愿学堂一席从此海内仰而望之千载后想而像之濂溪耶白鹿耶鳧盟久与之游吾知其不浣花柴而桑濂溪白鹿也

孙奇逢题愿学堂讲语后

右四书类

案年谱则五经并有讲语今惟存四书十一章载文集杂著中故并为一类

五音声韵辨

本朝马毓秀著佚

韵学真旨

本朝李予望著佚

右小学类

史部

西台奏议

明乔廷栋著

佚

右奏议类

案旧志艺文载有黄州曹本荣魏给谏史垣奏疏序盖敏果归养时所自辑者后再官御史为总宪疏稿愈富遂编入寒松堂集矣兹不别著其目

战功私绿一卷

明马芳著

存

予年二十二挟骑射从戎宣大间即负吞胡气当道者谬许予智勇于亦自誓杀贼报国嘉靖辛亥贼犯南口力战斩级始叙功小旗前此所获所俘固多受赏来也嗣以功升总旗百户千户指挥使癸丑升守备万全右卫悉心弹力日以奠安地方保障军民为计时军门抚按咸嘉予功荐升标下游击堵御截杀劳绩颇著寻升右卫参将甲寅岁北虏土蛮党部掠薊镇患甚升予三屯营副帅历任间奋力斩逐虏患稍宁丁巳酋首黄台吉率落部肆掠宣府猖獗殊甚乃转予宣府副帅于时地方城垣壕堑军马器械边防内守废弛不可言贼或数十骑一二十骑甚或数骑犯镇属城堡长驱深入岁不知几虏掠人畜略无顾忌商旅途行离墩半里即梟视狼顾凝望尘清方敢拍马道路几为不通居民耕种子粒垂黄早者幸获十一虏骑一来则任蹂躏室庐岁成悬罄星散小屯焚毁殆尽邻边墩堡杀虏一空不满所欲团结数日不去亦无敢发一卒一骑追逐

者真蹈无人之境矣予心切忿恨而主维人事多制肘惟日不遑食夜不安寝竭力截剿求尽乃心贼绿易视我军频年入犯虽累经挫折然犹沿边窥伺予因计诱冀其犯我大杀以纾夙忿或藏军丁于车内令人挽之北行假货运以赚贼百计诱之竟不敢逾界限边防渐觉宁谧岁庚申拜命节钺乃得锐意整刷焉城垣低薄者高厚之壕塹堙垫者浚凿之军马器械增置更作凡诸废坠一时改观握符八年俘获无算贼乃远遁隆庆四年春正月俺酋频犯云中岁多失事命予再总大同戎务予自从戎历大帅血战何啻数百仰仗朝廷威德频伸指授士众协助所至得不愆事庙堂数举边才凡若干本当道保荐素覆共若干章猥懦武夫诚为逾分但久历锋鏑身无完肤头骨百补气血耗伤腠理疏漏风湿易侵渐成痼疾每天将阴雨金疮旋发目眩耳鸣筋卷肉颤诸痛交作殆不能生后之子孙徒知予由某官历某官而不知实捐躯命博得者是录也非敢为张已功也特垂示子孙知予艰苦所自耳

自序

马征西智勇具备从戎以来大小战数百接能以少击多策定辄大捷史称为一时名将冠战功盖不胜绿矣六十以疾归作是编及图曰私录者为示后人言之也或以征西之功公不绿而私录之疑其为不平之鸣是非征西意然而有明录功之典则实有不可解者盖自成祖定都燕京宣镇实为之背和林余孽轆轤不宁卫所诸指挥外仍镇以总兵等官边计非不密然毁垣坏堡史不绝书而姑衍狼居胥之烈杳不可得贼闯自西来迎而致之者且出自挂镇印之承允则宣镇几无人矣虽然亦有之洪之镇宣也迤北谓之杨王万达之督师也俺答谓之翁太师其于征西也则亦以称万达者称之此皆足以惊敌而寒其胆者然统幕之难洪拥大兵十余万任其君

北狩而莫之救其视两太师何如然洪也侯且世侯矣两太师者独置之五瑞之外岂其功诚不足录哉即如是录所载三十余战固合大小并纪之而录于公者惟嘉靖九年新店一战而已至如隆庆二年秋以捣巢出边追奔二百余里群帐尽徙漠北我兵遂驻兴和盖二百年来官军不到之地亦二百年来边将未有之功九陞策勋即与开平中山并隆爵赏似亦非过然无有过而问之者非录功之咎而谁咎哉然不录于公以为帮家光未尝不可录于私以为子孙训其后征虏平羌先后靖国者阅三世而得七人忠贞世绪累叶争辉即谓由是录开之也可

仁 和 吳 廷 華 跋
案 廷 華 撰 志 补

載是录于外志凡二十六条茲擇其磊磊大者注于芳本传中录其序跋于此

文庙贤儒功德录三卷 本朝张英著 仕

原书无存或云文庙有木榜书贤儒事实犹其所辑者俟考

云中死事五人传 本朝李暄吉著 存

李子曰是五人者皆明死事臣也或以宗室或以守臣至诸生极矣然诸生犹尔懿亲若代率计出诸生下何哉终至被掠索金播越而死死等耳处死若是之悬耶坏以反复小人叛明叛闯叛我朝卒归授首宜矣余从云郡闻诸父老深惧往迹湮没亟书其事于策至论次更详不死者于死者不益可知欤呜呼足以鉴矣

案五人者永庆郡王某管理襄垣府事朱俊案大同巡抚卫景瑗大同监司朱家仕诸生李若葵也传載续垂棘编录其贊于此又案永庆郡王名彝棣天启

元年绍封明史诸王表不詳其死事此传亦未举其名也

云中节义录 本朝李暄亨著 佚

白沙子谓节义为道之藩篱山谷亦云平居甚异于俗人至临大节而不可夺则不俗人也盖人

自天生地成以来其三光五岳清明正大之气固无日不往来于人心则独全而受之全而归之以至齐利害一生死而确有以维纲常名教之重于不衰故论人而至节义难矣至节义之真足以传后尤难节义之真足传后而且获传于朴拙荒僻之乡更难盖名都大邑其间闻人志士类皆能怀铅握槧表隐阐微其俗又各风雅相尚一唱百和故一人也而或绘之于简牘或形之为歌咏一事也而或播之以梨枣或勒之于贞珉虽千百世下声消响寂而讲古尚友之好者犹能得之于断残碣间有以考其迹而卒以不没于后若夫荒僻之乡其俗朴既不知有名之传其人质又不计事之垂后即乡里后生与二三读书好古之士又皆泊然视为斯人斯理之所应尔故虽其节甚苦其义足传亦徒沈湮汨没于荒风冷雨寒烟蔓草中而不获炫耀称述于当事是节义在文物之邦不患其湮没而第患失实在荒僻之乡又不患其失实而特患灭没盖传世若是其难也不佞生长边隅备员金马每好探讨轶闻轶事因叹吾乡俗朴人醇其间负川岳正大之气纲维名教之卓然可称者在在不乏然或郁而未著或语焉不详故往时先大父曾有双烈之传先大夫又有孝子之表小子夙企懿行仰承先志窃不自揆妄欲网罗遗文共维雅化且以力矫吾乡质胜之病冀一阐往烈而发幽光第恨隐德多湮汇稽无自仅就耳目所及有合白沙所谓道藩篱山谷所谓不俗人者都为一帙颜曰节义录行将上之馆阁传之史局大书特书以副圣天子扶奖人伦振兴风化至意而兼以成先大父与先大夫乐道人善之盛心于未艾也夫

自序案此书喧亭行状墓志皆不载其目
岂生时已失稿耶其序见于垂棘编录之

魏实斋刺史西川实政纪略一卷 存

实斋名煜敏果公六世孙也书中作五世误书为煜幕友沈锐喻中邛张立
爱三人合著凡十九页载煜宦迹甚详本传不能备探也以有刻本存之

右传记类

两镇三关志 明君耕著 佚

吾乡尹莘野先生两镇三关志其记内边外边之防护山川关口之界限人丁土田之繁庶甲冑
刍粮之储蓄战守防堵之纪律囊括经史会萃韬略洋洋乎经济大手也先生世居蔚生明嘉靖
时少有神童之誉以青年捷黄甲授藁城令升河间太守以忤权要罢官终老于家屏俗谈虑掩
关著书书成而先生已抱木矣然先生之书在先生之死亦不朽予少习举子业耳先生之名未
及购其书而读迩来雅嗜古文遍觅向所称两镇三关志问之后人无有存者昨岁忽于澄园先
叔敝箴中得之把玩昏旦不离于寒山片石忽开生面赤文绿字陡见宝光如延津之剑离而
仍合合浦之珠去而复还此乃文星墨精时为守护岂赖人力之作意搜罗也哉

李舜臣跋两镇三
关志后案朔野是
书叙时事最详宣大诸志多采其文而遍访刻本竟不可得据明知州来临朔野先生传言访是书已缺数卷据乾隆初王育楸
蔚县志序言从舜臣得其半部舜臣预修县志则半部即所跋本也而跋中不言及顾有延津剑合合浦珠还语岂县志成后又
获其全耶然尔时已鲜流传若
此宜今州人仅能举其名矣

万历蔚州志 知州刘生和著 佚

皇上统天御极三十有六载德教覃乎方外信顺洽乎寰中文经武纬民安物阜太平景象偃古
罕睹已客岁丁未生和谬通南宫籍待次长安居恒流览志林渺如望洋今年春叨承简命来刺
蔚州夫蔚摄乎云谷之间吭背京鼎号锁钥重地稽之往牒实古代奥区也旧有志止于嘉靖戊
戌迄今得历三朝事体湮没会司风教者修全晋通志而收辑蔚萝生和甫策蹇至而民风未谙

竟属之谁何虽然郡之有志犹国之有史所以绍既往而诏方来也失今不为志则何以昭镜观哉乃咨司铎王君耀孟君宗孔刘君珍暨弟子员孙栋安边辈博采群议蒐剔素闻凡天文地理类详载成志不复更易爰取近之关乎风化足示劝惩涉于沿革用备省览列款分门别类编次成帙聊以今日为古始俾后之视今犹今视昔尔抑又有说焉志亦难言之矣家修左马人祖获麟其上也乃其强探鸿荒则诞而凿古旁参野稗则谐而诬褻工雕绘而寡素质则既骈拇于太始徒伎俩乎缥緲厄言冈实虽多奚补下迨叔世称良尤眇母亦才绌三长情守独见者哉是以盈庭靡执合辙为难况壶卢宛肖窝臼未脱声出雷同调希雪寡识者憾焉又或轻掷神珠妄安蛇足专贪务博不顾有无甚者人非其伦物非其产文非其构事非其真笔之图策斐然成章揆厥本委邈焉远实譬诸写真弗肖反类池人此于激扬将胡鲜矣夫是纂也不敢谓词熔于匠心义成于独断然而掇摭归要判华就质考为而要诸是该谬而统之真用以饰新因旧补缺为完表地灵人杰之概以仰副风励之盛心或庶几万分之一云若夫衷古今以定模妙化裁以垂镜请以俟之后有作者

自序

崇禎蔚州志三卷

知州来临著

佚

郡邑志曷昉哉粵稽周礼天下图籍掌于职方行人爰采轺车使者上诸天子统八极之纲以布同文之化国史载一邦故实以明述职之规是以明主端居九重而四方幽隐疏逖罔弗烛故不下堂而运之天下岂非有此具也哉周衰列国之史多缺而鲁犹存延陵季子曰周礼尽在鲁矣孔子因旧文而作春秋若是乎所关之重也蔚为古代界在北鄙当三关两镇之间实畿辅肩背

云谷襟喉也神庙以前承平垂六十年桴鼓不鸣遂成乐土迨因敌兵数入饥馑荐臻迄无宁岁安堵昔如彼也抢攘今如此也何其迥不相侔也哉昔贤谓师旅饥馑比及三年可使有勇且知方也余承乏是郡正三年于兹不揣庸猥勉事振励若缮城池增守御通输挽课耕稼非曰能之聊谆谆黽黽自以勤补拙期无负于职守焉尔蔚旧无志万历间渤海刘公创有志藁粗举大凡而详备未闻且无刻本以迄于今不特三十年掌故无稽而殷富萧条顿有今昔之异遂谋之衿绅諏于乡老询于闾野观山川之险易察风土之变迁感兵燹之频仍叹转输之艰虞著今昔完敝之易治而殊略每篇之中三致意焉历期月而志成乃属博士弟子员校正而付之梓人因叹曰自君民万里而民隐久不达于上矣今兹之志匪徒以存文献也庶几籍可稽情可达将以备太史之采焉自战守不讲而金汤久无所恃矣今兹之志匪徒述往迹也庶因地利而及人和以期后贤君子之守焉若谓昭诸侯述职之规也以遵王也明中外守御之防也大一统也非曰能之亦以自尽吾心期无负于职守焉尔其编次后先纪事详略具见例于志中矣是为序

自序案此志成于崇祯九年自李志出而其书遂废李志例不注所引书籍故其遗文莫得而详惟云中郡志刻于顺治壬辰在李志前所列蔚事当仍其旧兹纂新志搜采亦仅得数条略见梗概盖前人皆详于时事而疏于考古也

国朝蔚州志二卷 知州李英著

存

蔚志何为而作也一代之兴必有一代之制革故鼎新版图为重方輿宜首志焉蔚属燕赵之余言赵不言燕者志州而卫特附之正其名曰古代即今蔚州何也沿革明而得失可镜也疆域画而要害可审也星虽丽天分野实属于地灾祥亦从一方见之故列于沿革疆域之后若山川古迹风俗物产皆察地也是为方輿志大凡经理方輿之中者可考而知也次则志建置建置维何

以守国也则城池重以分职也则官署重以储民财以达军令也则仓库邮驿重皆缺一不可者夫有出政之地然后有布政之人继建置而志秩官重守土也大小勿遗篇帙繁甚惟本朝之官此地者一命必书若前代小吏存十一于千百耳

虽然得人则治不得人则乱入境而问政思过半矣爰作政令志某事倡率某事告诫兴利几何革弊几何顾可忽呼然国之大事惟祀与戍志武备者以观兵也志祀典者以报功也有昔略而今详者如军餉坛庙之类是也有昔分而今合者如名宦乡贤之类是也有昔重而今轻者如寺观之类是也作者其有尤患乎赋役国家之本重哉以验登耗以占盈缩以稽出入凡诸禄食廩饩祭享燕会无一不取之民者抚字生聚岂异人任故传曰有人此有土有土此有财有财此有用也然养立而教兴作学校志为要嗟乎不与祭不知敬也不读卧碑不知畏也不覩饮射不知孝弟之义也语曰师道立则善人多窃有取焉夫北鄙固尚武蔚地奋身文教者代不乏人即征辟之流名将之选亦国士也故志选举又志人物焉盖闻太上立德其次立功其次立言有一可传不能没也后之读列传者可以知人论世矣其忠孝义节之流各分一类用以维风而励俗岂细故哉若外志则裨官委巷也怪事凶德也存而不论论而不议可也至于艺文有志或以传事或以传人天下文章莫大乎是风云月露何足云云故抑而后之其作志大略如此上下二卷列

十二纲为十二集

蔚州志编次 志补云州大夫关李英重修州志都人士相传为敏果公所辑但据人物志所载魏公小传通体皆推重之辞若志出自公不近于自诩耶况体制文义及诸所考订有秦风其为李公之

书无疑案寒松堂集有重修蔚州志议又有州志编次问答其志卷首全载原文则其体例实公所定也

蔚州志补十二卷 知州杨世昌著 存

志而谓之补何也曰续也天下有倡必有续在天道者日月寒暑之往来在人事者古今帝王之代嬗是熟非以续而永之者志外史也正史之作也以迂固为之宗迂之史记以续谈固之汉书以续彪而续史及汉者如褚少孙刘向刘歆冯商杨雄及曹大家服虔伏俨应劭郑灼各不下数十家盖一代成法虽具而拾遗补阙不能无待于后之作者况地志所载代有变迁政有因革岂能以一书尽之州志作于刘公生和而来公临继之李公英又继之李公旧志历今八十余载州事之未载者已多无以续之无几于献邈文微耶夫是以补之也补之是矣但旧志之所谓州乃州与县合之州则志亦合州于县之志也今则分州与县而二之矣在城者县东而州西在野者或相错如犬牙或层隔如重轮叠珥则斯志所载已非复合县于州之旧矣夫何以谓之补曰是蔚人之不忘旧也前志辑自州牧关西李公或又谓寒松先生赞成之李公惠政懋著俎豆聿隆寒松先生理学气节为天下望遗编在世共珍之重其人以重其志不忍歿也故以补之者存之尔然则曷不名之曰蔚州新志以示不忘旧志之意而必谓之补曰是正蔚人之深意尔盖谓之新志则凡旧志所当存者将并入之新编后之征文考献者亦将惟新志是问旧志之名虽存亦任其蠹齧灭漫已耳畴复有操纸和墨出陈刻而鳩工者惟谓之补则州志必合二志而始详庶二公遗迹得以并行而不没者沈约萧子显诸家为八书矣而李延寿又合为南北二史刘昫为唐书矣曾欧诸家又为新唐书分见叠行未尝偏废此其例也惟是新志十二卷一以正史为宗旧志所载多有舍正史而别为之说者瑜瑕互存不适以昭旧志之舛耶曰羞珍离者去其

翠植佳木者作其蓄古之说经者有驳难有识误有辨疑有绳衍则作者原无嫌于索瑕求疵其不朽者自在也而况乎志若夫采旧志之粹入之是编而仍存旧志之名以别之则志为完书而阅者亦可免荆榛之拔继此者庶几留意焉

仁和吴廷华后序 案书前有总督高斌口北道王芥园宣化知府王毓三序及杨自序后有吏目王大猷州人陶介年两跋而作书大

旨惟吴序为详绿之其蒿即出于吴手也

蔚县志三十一卷 知县王育源著

存

蔚前为卫时无志即后为县时仍无志间有附见州志中者亦多缺略未备尝为向皋李先生言之未尝不互相咨嗟也戊午初秋余以簿书余暇颇有事于纂辑顾在州志前者即苦于参之考无籍而后者更苦于传述之莫据即欲征疑考信勒为成书垂法戒于将来其又奚所冀焉久之始从向皋先生得明宣镇志一部两镇三关志半部至

国朝所修云中志则终不可得乃即两志所载参以州志之仅存者本其事迹别为义例务期简而能括详而有体使大小各从其类而赤白相比成文部署即分规模乃定寻又以继此者之难以稽也谋诸向皋先生爰进苗贺宋董诸君子委以采访庶几旁搜远览之义岁聿云莫始先后各以籍来盖诸君子鬼罗既殷持择更审雅不乐聊且以从事也于是详加考订互为参稽权衡务平笔削唯谨事必穷其本末宁详无略人必核其初终宁严无宽虽阐扬固属夙心亦予夺悉洽公论至今岁春仲前后阅八越月乃获告厥成事为目三十约计数万余言虽其间山川秩官不无遗漏贡举不无参错然于一邑之故夫亦可云梗概略具矣夫郡邑之志掌之外史凡以扶翼斯文助流教化于无穷也若犹是听其散佚也将封域无志何以深保障之恩赋循无志何以

抚妥之方贤哲无志何以发景行之慕政教典礼无志质文因革何以辨习俗风尚无志汗隆淳漓何以分而有进余而问蔚之故者余又将何辞以对今而后亦可以执简以幸无罪矣乎然余从诸君子后参以未议管窥蠡测非敢遂有其功也而向皋先生勤于始无替于终尤能相余以溃于成云

自序 案序中向皋先生即李主事舜臣也余所称与纂修者苗式谷字先念贺永正字用六宋之彝字玉汝董铎字润章并岁贡

右地理类

国学礼乐录 本朝李周望著 存

成均典乐之职礼教之地也昉自虞迁其风尚矣周备四代之学王畿之内号为辟雍盖以明首善之义与乡学不同秦火以后学校沦废汉至元狩始议建于董生策中元成之世弟子增众光武重兴太学亲临讲论立十四博士以授五经明帝习射养老章帝大会诸儒一时虎观横经彬彬称盛晋武雅尚儒术以贾马郑杜伏孔王何之徒分立八家儒学命张华刘实领之太常咸宁后乃立国子学以教贵游子弟东晋士大夫习尚庄老流及六朝南北兴废无常至隋开皇国子寺始不隶于太常唐则六学皆归国子宋增三馆而学规之善莫或过于胡瑗焉三斋杂仪肇元许衡六堂考课沿明永乐日久废弛仅属空文

国朝定鼎京师振兴文教

世祖章皇帝视学释奠百废俱张我

皇上生知好古重道崇儒 御极之初即临雍讲学隆礼先师超越百代近特 制训飭士子文立碑造就加意劝惩时际雍熙礼明乐备久道化成更修辑诸经阐释性理辨别律吕审定元音集道

统之大成作君师之极范近复升村名儒增袞博士凡所以光辉俎豆鼓舞人材之典无所不至猗欤休哉士生金声玉振之世获渐菁莪拭之风良厚幸矣余自甲午承乏司业旋迁侍讲即奉命校士全楚日与诸生撤帙讲业务趋醇古以应昌期役竣复膺司成重任受恩汪渥报称无由爰与方山谢公冰兢共矢月吉宏宣 圣训督课惟勤而诸生文风亦日新月盛虽然国家储贤养士岂徒以文章华国润色鸿业云尔哉要求实行以资大用也余惟古之教士自小学以至大学即已身通六艺尤必陶养性情以为修齐治平之本春秋教以礼乐冬夏教以诗书入德有方修道有序兴诗立礼成乐次第较然不可易也太史公适鲁观孔子庙堂车服礼器诸生以时习礼其家乃故事之可证者况国学重地人才渊藪士列桥门之下而不辨礼仪乐器之详典祀损益之故又何以自立于儒雅之林备异日庙堂之选乎爰采志统诸书崔其繁冗少为编次绿成一书以示诸生俾知国学礼乐所在斯须不可离身亟宜研究义礼考核名实礼以谨其节乐以发其和庶几由博而约以渐臻乎希圣希贤之域仰承

圣天子寿考作人之化行且比隆周室远接虞延汉唐以后曷足道哉是为序

自序

右政书类

太学进士题名碑录 李周望著

佚

科目用人由来旧矣周礼大司徒以乡三物教万民而宾兴之又曰三年大比考其德行道艺献贤能之书于王王拜受之登于天府诚信之也诚重之也其人才则唯出于乡国二学乡学掌于乡大夫而用之在大司徒国学掌于大乐正而用之在大司马乡曰选士升于国曰造士大司马

所辨所论则曰进士此三物宾兴之典也汉世去古未远举士之制有三贤良孝廉博士弟子后世科目岁贡所由昉也隋大业时专以文辞试士曰进士唐用三科十九目其由学馆者曰生徒由州县者曰乡贡皆升于有司而进退之其天子自诏者曰制举所以待非常之才无常科也科目唐制亶其然乎天授时武后策贡士于洛城殿殿试昉于此宋进士诸科秋取解各集礼部春考试合格者放榜于尚书省开宝六年殿试贡士遂为永制八年始分三甲熙宁贡举新法罢诗赋专经义建炎以来兼用经义诗赋分作两科元仁宗立经书取士法八月乡试二月会试皆三场首场四书二经一二场诏赋表内科一道三场时务策一道书义用朱子章句集注而断以己意发明限三百字分左右榜蒙古色目为右汉人南人为左明洪武四年辛亥太祖始策问会试中式者于奉天殿赐一甲三人进士及第赐二甲进士出身三甲同进士出身以次授官十八年乙丑授一甲三人修撰编修俱人翰林使三甲观政于诸司其在翰林承敕监等衙门者曰庶吉士至永乐二年甲申选二十九人为庶吉士在文渊阁读书后惟翰林院有庶吉士其以及第第一人为状元第二人榜眼第三人探花则仿宋制而是时士大夫又通以三甲第一为传臚其会试第一者曰会元乡试第一者曰解元乡试以子午卯酉年会试以辰戌丑未年后虽条例数更其大纲固不易也

国朝定鼎京师声教訖于四海

世祖章皇帝裁定科举法制大备我

皇上道隆德盛寿考作人鼓舞振兴不遗余力而且范之以圣学教之以帝文久道化成与天同照

以故得士之盛直躋唐宋元明而上之跡漢魏周无让也太學題名碑記元仅有存者明代石刻旋闕旋補

國朝自順治丙戌康熙戊戌凡二十有八科惟壬辰乙未分滿漢二榜各三鼎甲及二甲三甲自后
歷科仍合为一榜未嘗分也士即釋褐登朝則必題名于學師師濟濟接踵匯征取士至今日而
極盛无以加矣我

皇上御極以來揭榜已二十有一次后更不知凡几非算數所能測也猗歟休哉

聖世樂育之英才遍列于棘槐大僚前三十年間

先帝之旧臣參錯在位迨于今日无一非對策颺言于我

皇之清問者矣或一門之內祖孫父子兄弟相繼而登朕士或異姓之交師長傳其弟子層累以降
源遠末分而并登華署者更不可勝數也試入成均游橋門所見穹碑林立莫不摩挲指顧曰某某
以德行傳某某以功業显某某以文章詞翰稱奎壁光華先后輝映非千載之胜覽哉余夙稟庭訓
繼迹科目承乏司成濫登宮尹不敢忘策名所自謹錄

國朝歷科題名碑姓氏為初集俟次第增益使多士觀感踴躍咸知我

皇教澤深厚文治郅隆以垂示无穷而元明旧碑之在辟雍者并附录之各考鏡焉是為序

白序

右目錄类

壺川拟史 本朝王家启著 佚

志补存汤誓
称王论一篇

右史評類

蔚州志卷十一終

蔚州志卷十二

志九

艺文志下 子部 集部
附录书目

子部

观心约一卷 明邹森著 存

学者知有太极而不知有易不知太极者也知有易而不知有心不知易者也仲尼尝言之矣曰正心孟之尝言之矣曰求放心曰养心周濂溪又言之矣曰纯其心曰诚其心故自古暨今上自邹鲁下迄河汾冒黎关闽濂洛诸君子不由观心而成大儒者有几哉天地间至变者莫如易始于一画究于二十六万二千四百四十爻上下十有八变一反一复因三十六变而分之为六十四此人道象数之所出也惟心可以造之始于八卦三位相乘爻约三象统于四千九百六十周而方图纵横万里以十八倍割之方圆相涵归于八尺之表晷端进退而历生焉此地道象数之所出也惟心可以运之自二十六万二千四百四十四又复倍之或两或参分律分度日月相追赢者进顺缩者退逆象之法十三分九毫微强以求气差本自然之盈缩依日月之迟疾以求日月星汉之次皆以一画参其八变视其归奇盈缩之故以分六十八岁八十五年之交会此天道象数之所出也惟心可以周之呜乎心岂易观哉善矣夫施四明之言也曰天下病虚救之以实天下病实救之以虚昔朱晦庵当五季之后毫杰皆溺于异说故宗程氏之学穷理居敬使人知